



HADITHI  
AMAKHUMI KANE  
TSIA NAWAWI

SHIAKALUKHASIBWA  
NENDE  
SHEIKH HAROON A. MSAH

A decorative border with intricate floral and geometric patterns, featuring scalloped corners and repeating motifs of leaves and flowers.

# HADITHI AMAKHUMI KANE

TSIA NAWAWI

*Shiakalukhasibwa Nende*  
**Haroon A. Msah**



Orio ingali khu

**Dr. Muhammad Shadi Kasskeen.**

omukhongo weshikanda shino  
okhurula mwitokho lia Sweden.  
okhwema ninafu okhulola mbu  
emilimo chino chiwa.

## HADITHI AMAKHUMI KANE

Mulira lia Nyasaye Owetsimbabaasi  
Owobukoosia, oluyali nolulwe lwoosi, Nyasaye khakaba  
omunyali wabuli eshindu.  
Omulembe kube khu Omurumwa wa Nyasaye Mohammad  
(*o.k.k*) oweshilibwa ikurani ilimwo obulunjifu nende  
tsimbabaasi khubiloonje bioosi. Omulembe kube khuye  
nende khubandu beyinzu yiyie nende abechi be nende  
boosi bamulondakhwo okhuula inyanga yeyindukho.

Hadithi namakuwa komurumwa yaboola nohomba  
yakhola nohomba kakholwa imbeli wuwe nafuchilila.  
amakuwa komurumwa namechesio kakololosia Abandu  
babe nende emilukha emilayi, banyoole okhumenya  
khushialo nabashiabwe munjila indayi. toto Nyasaye  
yafumia omurumwa mukurani olwayaboola mbu: “toto  
ewe oli nemilukho emilayi chiamakana”  
khandi naboola mbu: “toto ye shaboolanga khubwikombi  
bubwe tawe, ni ubufimbuli bwafimbulilungwa”  
khulutsi mbu nilikhuwa liahabwene ukhukalukhania  
amakuwa komurumwa kali mushitabu shia Imam  
Nawawi, hadithi amakhumi kane, kakhaba kario kakhoonya  
abasalamu nende balali abasalamu, kabalunjisia khunjila  
indayi.

*Nyasaye abanguyisile okhusoma amakuwa kali muno  
mana khwechesie abandu abulafu bweidini yeshisilamu.  
isaba Nyasaye ufuchilile emilimo chiefu chino achire  
khubusiro bwamalayi kefu inyanga yeyindukho.*

nesie omutakha wetsimbabaasi tsianyasaye: Sheikh  
Haroon A. Msah.

# AKALIMWO

1. oburanjilisi bwa imam Nawawi.....	6
2. hadithi ya ambeli (lichomo).....	9
3. Hadithi ya khabili (amatililo kobwisilamu).....	9
4. Hadithi ya khataru (tsisiilo tsiobwisilamu).....	10
5. hadithi ya khane (okhulongwa khwomundu munda).....	10
6. Hadithi yakharano (okhukaana obuchiishi).....	11
7. Hadithi yakhasaasaba (okhulekha amakhuwa amakaniakania.).....	11
8. Hadithi ya saba (okhuchelanila amalayi).....	11
9. Hadithi ya munane .....	12
10. Hadithi ya tisa.....	12
11. Hadithi ya ehumi.....	12
12. Hadithi ya ekhumi na ndala.....	12
13. Hadithi ya ekhumi na khabili.....	13
14. .Hadithi ya ekhumi nakhataru (obuyanzi).....	13
15. Hadithi ya ekhumi nakhane.....	13
16. hadithi ya ekhumi nakharano.....	13
17. hadithi ya ekhumi nakhasaasaba.....	14
18. Hadithi ya ekhumi na saba.....	14
19. Hadithi ya ekhumi namunane.....	14
20. Hadithi ya ekhumi na tisa.....	14
21. Hadithi ya amakhumi kabili.....	15
22. Hadithi ya .amakhumi kabili nandala.....	15
23. Hadithi ya makhumi kabili nende tsibili.....	16
24. Hadithi yamakhumi kabili nende tsitaru.....	16
25. Hadithi ya makhumi kabili nende tsinne.....	17
26. Hadithi yamakhumi kabili nende tsirano.....	17
27. Hadithi ya makhumi kabili nende tsisaasaba.....	18
28. Hadithi yamakhumi kabili nende saba.....	18
28. Hadithi ya makhumi kabili nende munane.....	18
29.Hadithi yamakhumi kataru.....	19
30. Hadithi yamakhumi kataru nende ndala.....	19
31.Hadithi yamakhumi kataru nende tsibili.....	19.
32. Hadithi yamakhumi kataru nende tsitaru.....	20

**Mulira lia Nyasaye**  
**Owetsimbabaasi owobukoosia.**  
**“Ne esho Omurumwa yabarerera mushibukule”**  
Quran 59:7.

**Uburanjilisi bwa Imamu Nawawi.**

Buli tsifuma tsindayi tsikhoyeshela Nyasaye, Omulesi webiloonje biosi, omulindi welikulu nende eshialo , ulia ukasilinjia amakhuwa ebilonje biosi, uwurumanga Abarumwa (oluyali lwa Nyasaye lube khubo boosi.) khulwokhulunjisia Abandu nende okhubenoosilia amalako keyidini, khubifune biokhubusia nende amemelo kali habulafu.

Omukalusilia oluyali khutsimbabaasi tsitsie tsoosi ne emusaba okhümetelwa tsimbabaasi tsitsie nende ubuhani bubwe.

Efuchilila mbu abulaho abulaho nyasaye watoto ulaamwa oulali Nyasaye yenyene, obula omusanji , ni mulala, Marimba, Omuhaani, Omulesheli.

Ne efuchilila mbu toto Omwami wefu Mohammad ni omusumba wuwe nende omurumwa wuwe nende omuhelwa wuwe omwitsa wuwe, omulayi muno mubiloonje, owahebwa tsimbabaasi khulwe lqurani ya amaani, amangalimwa katsililila shingala imika chibura, nende emilukha chichie chikhoselia abeenya okhulunjikha. Omwami wefu Mohammad, owatilasibwa nende likhuwa lititi likhung'aasia, nende obwangu bwe idini, tsimbabaasi tsia Nyasaye nende omulembe kukwe bibe khuye, nende abarumwa bandi boosi, nende abandu bebe nende abandu abalayi bandi.

Kakanwa okhurula khu Ali omusiani wa samwana Twalib ne Abdullah omusiani wa maswood nende muadh omusiani wa jabal nende samwana dardaa nende omusiani wa omar, nende omusiani wa abbas, nende Anas omusiani wa malik, abu Huraira nende samwana said alkhudhry, Nyasaye abachamile, toto omurumwa wa Nyasaye yaboola mbu:

*“ ulia wokhutila mumukanda kwanje hadithi amakhumi kane, tsia makuwa keyidini yabu, Nyasaye alimulamusia inyanga yeyindukho mumukanda kwabasomi (abamalako) nende Abamanyi.*

*Ne mukhukanwa khundi:*

*“Nyasaye alimulamusia nali omuchesi wa malako, nende omumanyi.”*

*Ne mukhukanwa khwa Abu Dar-dai:*

*“Ne inyanga yeyindukho ndiliba usabila abaloli bebe”*

*Ne mukhukana khwa Omwana wa Masood:*

*“Alibolelwa mbu injila mwikulu mumuliango kwosokwosi kwa wenya.”*

*Ne mukhukana khwa Omwana wa Omar. : “alilandikwa mumukanda kwabamanyi ne ali yabululwa halala nende omukanda kwabaloli. (abashahidi)”*

Abamanyi ba hadith bafuchilisania mbu hadithi ino ni indeshele kata nili nende tsinjila tsinyinji tsia yakanilwamwo.

Abasomi abanji okhulondokhana nende amakuwa kano bahandika obuhandichi obunji bulabalikha. Wokhuranjilila wandamanya ni Abdullahi bin Mubarak, mana khandi Ibn Aslam at- Tusi, Omusomi owaria Nyasaye, mana al- Hasan omusiani wa an-Nasaai, Abu Bakar al- Aajuri, abu bakar mohammad omusiani wa Ibrahim al- asfahani, ad- Daraqutni, al- hakim , abu Nu'aym, samwana Abdurahman as-Sulami, samwana said Almaaalayni, samwana Uthaman aswabuni, Abdullah omusiani wa Mohamad al- Answary. Abu bakar Al- Bayhaqi ne abandi abaanji abalabalikha tawe, abaranjilila nende balia abeetsa inyuma.

Asabile Nyasaye khukung'asia thihadithi amakhumi kane, nenoonda abamilisi abechesi abo nende abalesi bobwisilamu. Abasomi boosi bafuchilisia mbu shinobubi okhwikhonyela hadithi indeshele khumakuwa kalali kamalako tawe. Halala nende yako, shendisichile hadithi yino tawe, halali ndikhonyela amukhuwa ko Murumwa (saw) mbu: " owuliwo mwinywe yosilie owulaliwo tawe" nende likhuwa lilie lindi mbu: " Nyasaye amutswenule omundu wawulila amakuwa kanje, mana nakatila mumwoyo mana nakakholela emilimo shinala yakawulila."

Baliho abasomi bandi bakhung'asia tshihadithi amakhumi kane okhulondokhana nende eshisina shieyidini, ne abandi khumasaka, ne abandi okhulondokhana nende Okhukhalabana (jihad) , abandi okhulondokhana nende ekhuhelesia omukongo eshialo, abandi okhulondokhana nende abiima ne abaandi okhulondokhana nende amakambo. Tsioosi etsio tsiali nende lichomo lilayi, Nyasaye abachamile amachomo kabu.

Endutsi mbu ekhung'asie hadithi amakhumi kane, tsikhoyeshela muno okhushilakhwo etsindi etso tsiosi. Natso nihadithi amakhumi kane tsikhung'asia koosi. Buli hadithi ndala mweitso ili nende obulunjisio obukhongo mudini yenoosibwa mbu nende abasomi mbu ni ichinjile obwisilamu nohambo eshitonye shobwisilamu nohomba eshitonye shia khataru shiabwo nohombo shinga endio.

Khandi khulwa okhulola mbu hadithi tsiosi tsili muno ni tsiahabwene ne tsinyinji mutsio okhuba mu bitabu ebia habwene (swahihi) bibili ebia Bukhari nende Muslim. erumbulanga hadithi tsino nindalarumbula olunyalil lwabandu batsikana tawe kho bube obwangu okhutsifila mumwoyo ne tsinyoole okhukhoonya muno, Nyasaye nachama. Mana netsilondiakhwo omuliango kwinosia amakuwa amatinyu.

Kenyekhana khubuli ulia wenya mwikulu amanye hadithi tsino, khulwa amakuwa amalayi kakhung'asibwamo, nako ni okhwinoosia amakuwa kokhuwulila. Ako kali habulafu khu uia uparamwo. Omesiko kanje ni Khu Nyasaye ne nikhuye niwa makani kanje kali ne niye wandisikanga. Oluyali nolulwe nende obulayi, ne ewuwe ni obunyalikani nende obwiliindi (okhurulana nende amabii)





# 1. HADITHI YA AMBELI.

## LICHOMO.

**Okhurula khu Omwimilisi wabasubili Samwana Hafsa, Omar Omusiani wa Khatwabu-Nyasaye amuchamile- yaboola mbu:**

**Ndawulila Omurumwa -oluyali lwa Nyasaye lube ninaye –naboolanga mbu:**

*“Toto emilimo chiosi chibetsanga nende lichoomo, Netoto buli likhuwa lilishingala liachomwa, kho ulia wokhuwuya khukhwe nishichila Nyasaye nende Omurumwa wuwe okhuwuya khukhwe kulaba khu Nyasaye nende Omurumwa wuwe, ne ulia wokhuwuya khukhwe khulaba shichila eshialo ashinyoole nohomba omukhasi amuteshie kho okhuwuya khukhwe khulaba khukayawuyila’”.*

**[Hadithi ino Bukhari nende Muslim bafuchilisania mukhuyikana]**

# 2. HADITH YA KHABILI.

## AMATILILO KOBWISILAMU.

**Okhurula khandi khu Omar – Nyasaye Omuchamile- yaboola mbu:**

*“olwa khwali nikhwikhaale ewa Omurumwa wa Nyasaye oluyali lube ninaye- inyanda yindi, Omundu yarulila nende tsingubo tsindafu tawe, weliswilimali ti, nalalolekhakhwo shinga omundu urula khuluchendo tawe, abulao yesi yesi omumanyile mwifwe, okhula shingala yekhala ahambi nende Omurumwa, (saw) mana natisania amasikomo keye nende ako Omurumwa (saw) ne nara amakhono keke khumarango, mana naboola mbu: “ewe Muhammad! Mbolelekhwo okhulondokhana nende obwisilamu? “ Omurumwa naboola mbu: “obwisilamu ni okhufuchilila mbu abualaho yesiyesi olaamwa khubwatoto halali Nyasaye, nende okhuchama mbu Mohammad ni Omurumwa wa Nyasaye. Mana olumilile okhulaama (Iswala) ne orusie eshihanwa (izakaa) ne Ofunge Ramadhani (Saumu) ne otsie khunzu ya Nyasaye nonyalilwa okhuula” naboola mbu: “oli habwene” mana nikhuwuka , amureeba, neye akalusia. Naboola mbu oli habwene.*

*Mana nareba mbu : “mbolelekhwo okhulondokhana nende obusuubili?” naboola mbu: “ni okhusuubila Nyasaye nende Abamalaika bebe nende ebitabu bibie nende Abarumwa bebe nende inyanga yeyindukho, nende okhusuubila mu qadar (kalikhunyoola), ka Nyasaye yakhulachila amalayi nende amabii.” Naboola mbu: “oli habwene.”*

*Naboola mbu: “mbolelekhwo okhulondokhana nende Ihsani?” naboola mbu : “ni okhulaama Nyasaye shinga nomulolanga nenoli mbu shomulolanga tawe ye akhulolanga.” Naboola mbu mbolelekhwo okhulondokhana nende inyanga yeyindukho?” naboola mbu: “urebungwa shayimanyile muno okhushila urebanga tawe.”Naboola*

mbu: “nekhambolelekhwo ebimanyisio biayo?” naboola mbu: “ni omukhasi Omurumwa okhwibula Omwami wuwe, nende okhulola abachendanga amakulu amakhaya , abashiekenyi, abatakha , abayyi bebiayo nibashilana khukhumbakha tsinzu tsindaambi. “ mana narula niyenyokha. Niyekhala oluwoono olutiti, mana naboola mbu : “ ewe Omar omanyile wakharebanga oyo? “ nemboola mbu: “ Nyasaye nende Omurumwa wuwe nibo bamanylie.” Naboola mbu: “toto oyo ni Jibreel abeetsele okhubechesia idini yenyu.”

**(Muslim niye wachikana.)**

### **3.HADITHI YAKHATARU**

**TSISILO TSIOWISILAMU.**

**Okhurula khu samwana Abdu Rahman Abdullahi Omusiani wa Omar wa Khatwab - Nyasaye abachamile- Yaboola mbu: ‘Ndawulila Omurumwa wa Nyasaye [SAW] naboolanga mbu:**

“ Obwisilamu bwombakhwa khu makuwa karaano: okhufuchilila mbu shibulaho shiosi shiosi shilaamwa khubwatoto tawe halali Nyasaye yenyene, ne toto mbu Muhammad ni Omurumwa wa Nyasaye, nende okhulaama iswala nende okhurusia eshihanwa[izakaa] nende okhuhija khuinzu, nende okhufunga saumu mumwesi kwa Ramadhan.”

**(Bukhari nende Muslim nibobachikana.)**

### **4. HADITHI YA KHANE**

**OKHULONGWA KHWOMUNDU MUNDA.**

**Okhurula khu Samwana Abdurahman Omusiani wa Masood Nyasaye amuchamile yaboola mbu: Omurumwa [saw] yakhuboolela- naye niwatoto omwisikwa po- mbu:**

“Toto mulala wenyu okhulongwa khukhwe khukhung'asibungwa munda ya nyinamwana tsinyanga amakhumi kane amatsi kolwibulo, mana abe lilika shinga endio, mana shinga inyama iyengu yengu shinga endio, mana arumilungwa malaika mana amufuremwo omwoyo ne alomesibwa amakuwa kane: Okhwandika omukabo kukwe nende indukho yiyie nende ebikhole bibie nende nali omubi nohomba omulayi.

Nditsuba khu Nyasaye abulao Nyasaye ulali ye mbu toto mulala khwinywe anyala okhukhola emilimo chiabandu bomwikulu okhula shinga aba ahambi nende mwikulu shinga omukhono mulala mana akalukhane akhohle eshikhohle shiabandu bomumulilo niyenjilamwo.

Netoto mulala wenyu anyala okhukhola ebikhohle bia bandu bomumulilo okhula shinga aba hakari wuwe nende hakari womulilo eshichelo shiomukhono mana akalukhane akhohle eshikhohle shia abandu bo mwikulu mana yenjilemwo]

**(Bukhari nende Muslim nibobachikana.)**

## 5. HADITHI YA KHARANO.

### OKHUKAANA OBUCHISHI.

**Okhurula khu Nyinamwana Abasuubili Nyina Abdullah Aisha -Nyasaye amufuchilile- Yaboola mbu Omurumwa wa Nyasaye – omulembe kube ninaye yaboola mbu:**

*“Ulia yesi yesi wibukha mulikhuwa liefu lino nende likhuwa lilalimwo tawe, alakalusilibwa omwene”*

**Bukhari nende Muslim nibo bachikana.**

**Ne mukhukana khwa Muslim – [ulia ukhola emilimo okhubula amalomesio kefu alakalusilibwa omwene]**

## 6. HADITHI YA KHASASABA

### OKHULEKHA AMAKANIAKANIA

**Okhurula khu Samwana Abdullahi Numan Omusiani wa Bashir Nyasaye abachamile yaboola mbu ndawulila Omurumwa wa Nyasaye [saw] naboolanga mbu:**

*“Toto amakuwa kafuchililwa [Halal] kali habulafu na amakuwa kakanibwa [Haramu] kali habulafu. Na hakari wako khuli nende amakuwa kakaniakania abandu abanji shibakamanyile tawe kho ulia uria amakaniakania alaba ukholele obulayi idini yiye nende oluyali lulwe.*

*Ne ulia winjila mukokhukaniakania alaba yenjile mukakanibwa [haram] shingala omwayi yayanga khundulo khweyindalo ayendelelwa okhulisiamwo.*

*Manye mbu buli omwami ali nende indalo ne mumanye mbu indalo ya Nyasaye ni amakuwa kayakania.*

*Ne manye mbu toto mumubili khulimwo nende eshitonye shieyinyama nishiba eshilayi-omubili kwosi kulaba omulayi. Ne nishiba eshibii omubili kwosi kulaba omubii, koo manye mbu oko ni omwoyo”*

**(Bukhari nende Muslim nibo bachikana.)**

## 7.HADITHI YA SABA

### OKHUCHELANILA OKHWENYANILA AMALAYI.

**Okhurula khu samwana Ruqayia Tamim Omusiani wa Aus Adariy- Nyasaye amuchamile- Toto Omurumwa [saw] yaboola mbu ;**

*“idini ni [okhwenyanila amalayi] okhuchelanila amalayi...: nikhuboola mbu:” khu shina?” Naboola mbu : “khu Nyasaye nende eshitabu shishie nende Omurumwa wuwe nende abemilisi babasalamu nende abasalamu boosi.”*

**[muslim niwachikana]**

## 8.HADITHI YA MUNANE

**Okhurula khu Omusiani wa Omar -Nyasaye abachamile- Toto Omurumwa wa Nyasaye - oluyali lube khuye- yaboola mbu:**

*Ndalomesibwa okhulwana abaandu okhula bafuchilile mbu abulaha Nyasaye ulaamwa khubwatoto owulali Nyasaye ne Muhammad ni Omurumwa wa Nyasaye mana balumilile okhulaama [Iswala] ne barusie ishihanwa [izakaa] Nibakhola bario balaba belindile okhurulana ninasi amatsayi kabu nende omwandu kwabu halali khushia obwisilamu bwenya, ne omurungo kwabu kuli khu Nyasaye woluyali."*

**(Bukhari nende Muslim nibo bachikana.)**

## 9.HADITHI YA TISA.

**Okhurula khu Abu Huraira Abdurahman Omwana wa Swakhr- Nyasaye amufuchilile- yaboola mbu: Ndawulila omurumwa wa Nyasaye [saw] naboolanga mbu:**

*"Aka emukaniyie mwire ehale ninako ne akebalomesiyie okhukhola mukakhole amunyalilwa ne toto balia abaali imbeli wenyu basikha shichila amareebo kabu amaanji nende okhwawukhana khubarumwa babu'*

**(Bachikana Bukhari nende Muslim)**

## 10. HADITHI YA EKHUMI.

OKHULIA [HALALI] ESHIFUCHILILWA.

**Okhurula khu Abi Huraira - Nyasaye amuchamile - yaboola mbu; Omurumwa wa Nyasaye [saw] yaboola mbu:**

*"Toto Nyasaye ni Omulayi ne shafuchililanga halali eshilayi, netoto Nyasaye yalomesia Abasuubili kalia akayalomesia Abarumwa. Nyasaye aboola mbu: 'Enywe Abarumwa lie ebindu ebilayi ne mukhole amalayi' Ne aboola khandi 'Enywe balia basuubila lie ebilayi ebia khubakabile' mana nachelasia Omundu urula khuluchendo olurambi akutiushile liswi, olufu lumwitsulekhwo achingulanga emikhono chichie mwikulu naboola mbu: " Nyasaye wanje Nyasaye wanje" ne eshililwa shishie nishiakanibwa,ne eshiokhunywa shishie nishiakanibwa ne tsingubo tsitsie nitsiakanibwa ne yakhulila ebiakanibwa, yakhafuchililwa arie?"*

**(Muslim niye wachikana.)**

## 11. HADITHI YA EKHUMI NANDALA.

OKHURIA NYASAYE.

Okhurula khu Samwana Muhammad Hassan Omusiani wa Ali Omwana wa Samwana Twalib Omwitsukhulu womurumwa (saw) nende Omuhelwa wuwe – Nyasaye abachamile – yaboola mbu;

*“ndatila okhurula khumurwa wa Nyasaye (saw) mbu : (lekha likhukaniakania otila lilia lilakhukaniakania tawe.)*

**(Tirmidhy nende Nasaai nibo bachikana.)**

## 12. HADITHI YA EKHUMI NAKHABILI.

OKHUKHAYA OKHWIYINJISIA MUKOLAKHOYESHELE.

Okhurula khu Abu Huraira – Nyasaye amufuchilile – yaboola mbu : Omurumwa wa Nyasaye (saw) yaboola mbu:

*“mumulukha emilayi chobwisilamu bwomundu ni okhulekha amakuwa kalamukhoyeshela tawe.”*

**(Hadith indayi yachikana Tirmidhy nende owundi endio butwsa.)**

## 13. HADITHI YA EKHUMI NAKHATARU.

OBUYANZI.

Okhurula khu Samwana Hamza Anas Omwana wa Malik- Nyasaye amuchamile- omurumishi womurumwa wa Nyasaye (saw).. Okhurula khumurumwa wa Nyasaye yaboola mbu:

*“Mulala wenyu shiyakhaba nasuubile tawe okhuula achamile owashie akayechamila omwene.”*

**(Bukhari nende Muslim nibo bachikana.)**

## 14. HADITH YA EKHUMI NAKHANE.

NILINA WAMATSAYI KOMWISILAMU KANYALA

OKHUSUNDULWA.

Okhurula khu samwana Masoud -Nyasaye amuchamile – yaboola mbu: Omurumwa wa Nyasaye yaboola mbu:

*“Shikachamilwa amatsayi komwisilamu okhusundukha tawe halali shilala khumakuwa kataru: Omundu watekha/ wateshia nayilana, ( nayeya ).. ulia wirire omundu wundi, nende ulia uleshele idini yiyie, wirere ehale nende abandu.”*

**(Bukhari nende Muslim nibo bachikana.)**

## 15. HADITHI YA EKHUMI NAKHARANO.

EBIIMA EBILAYI.

**Okhurula khu Abi Huraira – Nyasaye amuchamile – toto omurumwa wa Nyasaye yaboola mbu:**

*“ ulia wasuubila Nyasaye nende inyanga imalilishi aboole amalayi nohomba awuleele. Ne ulia wasubila Nyasaye nende inyanga imalilishi okholele obulayi omumenyanwa wuwe. Ne ulia wasuubila Nyasaye nende inyanga imalilishi akholele obulayi omucheni wuwe.”*

**(Bukhari nende Muslim nibo bachikana.)**

## 16. HADITHI YA EKHUMI NAKHASAASABA.

LIRUMA.

**Okhurula khu Abu Huraira – Nyasaye amuchemile-**

*(toto omundu yaboolela Omurumwa (saw) mbu : njelelekhwo, namuboolela mbu : olasinyikha tawe, mana nakalushila oluwoono, naboola mbu: “olasinyikha tawe.”*

**(Bukhari nende Muslim nibo bachikana.)**

## 17. HADITHI YA EKHUMI NA SABA.

IHSAAN (OBULAYI).

**Okhurula khu Samwana Ya’laa Shadaad Omusiani wa Aus – Nyasaye amufuchilile, okhurula khu Murumwa (saw) yaboola mbu:**

*“Toto Nyasaye yahandika obulayi khubuli eshindu. Kho nimwira mwire obulayi, ne nimusinza musinze obulayi. Ne ayiakale obulayi omubano kukwe, ne alolele eshisinzwa eshisie”*

**(Muslim niye wachikana.)**

## 18. HADITHI YA EKHUMI NAMUNANE.

EBIIMA BIESHISILAMU.

**Okhurula khusamwana Dhar Jundab, Omusiani wa Juanaada nende Samwana Abdurahman Muadh umusiani wa Jabal- Nyasaye abachamile- okhurula khu Murumwa wa Nyasaye (saw) yaboola mbu:**

*“Ria Nyasaye wosi wosi woba noli, ne londia lilayi khuliibi liokholele lillyinieho, ne winjilane nende abaandu khu biima ebilayi.”*

**(Ne khandi Tirmidhy yesi yachikana naboola mbu hadith indayi ne mubitabu bindi ni indayi yahabwene.)**

## 19. HADITHI YA EKHUMI NA TISA.

**Okhurula khu Samwana Abbas Abdallah omusiani wa Abbas- Nyasaye abachamile – yaboola mbu:**

*'' Ndali inyuma Womurumwa (saw) inyanga yindi mana niyambolela mbu: ''ewe omusiani toto esie ekhwechesia amakuwa: Linda Nyasaye, alakhulinda. Linda Nyasaye olamunyoola elubeka wuwo. Noreeba reeba Nyasaye, ne niwenya obukhonyi yenya khu Nyasaye. Ne manya mbu toto abandu boosi nibebuusia mbu bakhukhoonye shiosi shiosi shibanyala okhukhoonya tawe halali khushindu shia Nyasaye yamala ukhuhandichila. Ne nibebuusia mbu bakhukholele amabii kosikosi shibakhukholela tawe halali kalia aka Nyasaye yakhuhandichila. Tsikalamu tsiamala okhuchingulwa ne tsimbapulo tsiamala okhuuma.''*

**(Tirmidhy niye wachikana naboola mbu ni hadithi indayi yahabwene.)**

**Ne yakanwa munjila yindi yilali ya Tirmidhy mbu:**

*''Linda Nyasaye olamunyoola imbeli wuwo. Ne manya Nyasaye noli mubwokholo alakhumanya noli mubutinyu. Ne manya mbu likhuburire shiliali mbu likhunyoole tawe, ne liakhunyoola shiliali mbu likhaye okhunyoola tawe. Ne manya mbu toto obushili buli halala nende okhwifwila. Netoto obulayi buli nende omunyakhano, ne toto obusiro buli halala nende obwangu.''*

## 20. HADITHI YA MAKHUMI KABILI.

TSISONI.

**Okhurula khu Samwana Masoud Uqba Omusiani wa Amru Answary wa Badru, -Nyasaye amuchamile yaboola mbu: Omurumwa wa Nyasaye (saw) yaboola mbu:**

*''toto kalia kanyoola abandu mukoburume bwaranjilila ni mbu: ''nolalola tsoni tawe, nekhakhola liawenya.''*

**(Bukhari niye wachikana).**

## 21. HADITHI YA MAKHUMI KABILI NENDE NDALA.

**Okhurula khu Samwana Amru ne keboola mbu Samwana Amra-Sufyan Omusiani wa Abdallah- Nyasaye amuchamile – yaboola mbu:**

*'' ewe Omurumwa wa Nyasaye mbolelekhwo mubwisilamu likhuwa liandalareeba yesi yesi tawe halali ewe. Naboola mbu: ''boola mbu esuubile mu Nyasaye , mana olunjikhe.''*

**(Muslim niwachikana)**

## 22. HADITHI YA MAKHUMI KABILI NENDE TSIBILI.

KALIA KENJISIA MWIKULU.

Okhurula khu Samwana Abdallah, Jabir Omusiani wa Abdallah Al answary, - Nyasaye abachamile- yaboola mbu : “toto Omundu yareeba Omurumwa (saw) naboola mbu:

“ olola orie nenaama tsiwala tsiakhwalachilwa,mana efunge Ramadhani mana ekhole kafuchililwa ne endeshe kakanibwa ne nindalametakhwo shiosi shiosi khu ako tawe ndakhenjla mwikulu?” naboola mbu: “ eeeh”

(Muslim niwachikana.)

## 23. HADITHI YAMAKHUMI KABILI NENDE TSITARU.

OKHUYUNGUBALILA AMALAYI.

Okhurula khu Samwana Malik Al-Harith Omusiani wa Asim Alashary – Nyasaye amuchamile- yaboola mbu: Omurumwa Wa Nyasaye yaboola mbu:

“obutswenufu ni ebuleka wobusuubili. Ne okhuboola mbu ‘Alhamdulilah- (uluyali lwoosi ni lwa Nyasaye) khwitsusinjia eshichelo . ne okhuboola mbu: subhana Allah, alhamdulilahi.. (obwitsoomi nende oluyali lwoosi ni lwa Nyasaye) bitsusinjia akali hakari welikulu nende eshialo. Ne iswala nobulafu, ne eshihanwa isadaka ni eshifune. Ne okhwisumilisia nobulafu ne iqurani ilikhukhoonya nohomba yakhakhalukhane. Buli shiamundu yelushila omwoyo kukwe, kho balimwo bakusinjia emioyo chiabu khulwa Nyasaye, khulwa okhukhola amalayi. mana nabanunula. Ne baliwo bakusinjia emioyo chiabu (khulwa okhuloonda shetani) mana nabasishia.”

(Muslim niwachikana)

## 24. HADITHI YA MAKHUMI KABILI NENDE KHANE.

IFUMA YA NYASAYE.

Okhurula khu Samwana Dhar al-ghafary – Nyasaye amuchamile – okhurula khumurumwa khukalia akakanilungwa okhurula khu Nyasaye wuwe Owoluyali , toto ye yaboola mbu:

“Enywe abasumba banje, esie ndekania okhukholela yesiyesi obubii, mana nebakaya mwesi okhukholelanila obubii, kho mulakholelanila tawe. Enywe abasumba banje, mwesi pe muli abakori okhuyiniakhwo ulia welunjisiye. Kho musabe obulunjifu nditsa okhubalunjisia. Enywe abasumba banje mwesi muli inzala okhuyiniakhwo ulia weliisiye, kho musabe obulesheli nditsa okhubaliisia. Enywe abasumba banje mwesi muli eshiekenyi okhuyiniakhwo ulia wefwalile, kho musabe ebafwale nditsa okhubafwala. Enywe abasumba banje enywe mwononanga eshilo nende eshitere, nasi endeshelanga tsimbi tsiosi, kho musabe



eshileshelo nditsa okhubaleshela. Enywe abasumba banje toto enywe shimunyala okhukhola libii mwawumisia tawe, nohomba shimunyala okhukhola obulayi mwakhoonya tawe. Enywe abasumba banje, kata nikali mbu owambeli wenyu nende wokhumalilikha wenyu mubandu nende mumajini babetsanga mbu ni ababii muno shinga shiamulala wabu, shibiakhatutuyiekhwo mubwami bwanje shiosi shiosi tawe. Enywe abasumba banje kabetsanga mbu wa ambeli wenyu nende wokhumalilikha mubandu nende mumajini bemanga ilubeka lulala mana bareebe ndakha helesiye buli shiamundu eshiarebele ne shibiakhatutuyiekhwo shiosi shiosi khubiendi ninabio tawe halali shinga isindani olweyirebungwa munyanza. Enywe abasumba banje. Enywe abasumba banje toto ebo nebikhole bienyu, ebakhung'asilinjia mana ndilibarunga khubio. Ulia ulinyoola amalayi alikhupila Nyasaye orio. Ne ulia ulinyoola kalali kario tawe shalifunania yesiyesi tawe halali ye omwene."

**(Muslim niwachikana).**

## **25. HADITHI YAMAKHUMI KABILI NENDE TSIRANO.**

OKHUSHILANA KHWEMILIANGO CHIAMALAYI.

**Okhurula khusamwana Dhar – Nyasaye amuchamile- yesi khandi yaboola mbu: "toto abandu okhurula mubechi bomurumwa (saw) baboolela Omurumwa (saw) mbu:**

*" ewe Omurumwa abandu abayinda batsile nende emirungo chiosi. Balamaanga shinga khulamanga, bafunganga shinga khufunganga ne bahininjia eshihanwa eshikhongo mumiandu chiabu. Naboola mbu: Nyasaye shiyamukasilia shiamuhinia shinga ishihanwa? Toto buli khukhwitsomia Nyasaye ni ishihanwa, buli mukhuboola mbu: (Allahu akbar) Nyasaye ni Omukhongo muno, ni ishihanwa, ne buli mukhuboola mbu: (Alhamdulillah) oluyali lwosi nilwa Nyasaye ni ishihanwa. Ne buli mukhuboola mbu (Ia ilaha ila Allah) abulaho ulaamwa khubwatoto halali Nyasaye, ni ishihanwa. Okhulomesia amalayi ni ishihanwa nende okhukania amabii ni ishihanwa. Okhuliimana mubukono nomundu (welilako lifuchilila) ni ishihanwa." Nibaboola mbu: ewe omurumwa wa NYasaye, omundu amala obuluma bubwe ne aba nende omurungo khuko?" Nakalusia mbu: "mulola murie abetsanga mbu amalile obuluma bubwe khumundu wayakanibwa shiyakhabeele nomusiko (tsimbi)? Ne endio ulia ukhola nende ulia owafuchililwa alaba nende omurungo."*

**(Muslim niye wachikana.)**

## 26. HADITHI YA MAKHUMI KABILI NENDE TSISAASABA.

OKHUPA ORIO KHUTSIMBABAASI.

**Okhurula khu Abu Huraira – Nyasaye amuchamile- yaboola mbu: omurumwa wa Nyasaye yaboola mbu:**

*“Buli eshindu khumubili kwomundu eshihanwa shilikhwo. Buli inyanga yeliuba lirula okhukaasia omuleembe hakari wa babili ni eshihanwa. Okhukhoonya omundu khu isolu yiyie imuchingekhwo nohomba okhuchitiukha omusiko ni eshihanwa. Nende likhuwa lilayi ni eshihanwa. Ne buli eshileenje shioseena notsia okhulaama ni eshihanwa. Nende okhurusia ebisinyo khunjila ni ishihanwa (isadaka.)”*

**(Bukhari nende Muslim nibo bachikana.)**

## 27. HADITHI YAMAKHUMI KABILI NENDE SABA.

AMALAYI NENDE AMABII.

**Okhurula khu Nawas Omusiani wa Sam’aan –Nyasaye abachamile – okhurula khu Murumwa (saw) yaboola mbu:**

*“Amalayi ni okhuba nende ebiima ebilayi, ne amabii nikalia kali mushilifu shishio ne shochamila abandu okhukamanya tawe”*

**(Muslim niwachikana.)**

*Ne okhurula khu Wabiswa Omusiani wa Ma’din – Nyasaye omufuchilile- yaboola mbu: ndetsela Omurumwa (saw) mana naboola mbu: “witsile okhureeba okhulondokhana nende obulayi?” Nemboola mbu: eehh. “Mana naboola mbu: reeba Omwoyo kukwo, amalayi nika omwoyo kukwo kwihotselesia ninako, ne amabii niko kahandanga mumwoyo nikakaniakania mushilifu, kata abandu nibakhwibaalila mana bakhwibaalile”*

**(Hadith indayi. Khwachibukula okhurula mubitabu bia abemilisi babili Ahmed Omusiani wa Hambali nende Adarimy. Khukhulondokhana okhulayi.)**

## 28. HADITHI YAMAKHUMI KABILI NENDE MUNANE.

AMACHELO.

**Okhurula khu Samwana Najih Al-irbadhi Omusiani wa Sariya – Nyasaye amuchamile- yaboola mbu:**

*Omurumwa yakhukambila amakambo emioyo chiefu chiara, tsimoni tsiefu tsiabeena amasika, nikhuboola mbu: “ewe Omurumwa wa Nyasaye kali shinga amakambo kokhukhusebula. Kho khuchelelekhwo.” Naboola mbu: “ebachelela okhuria Nyasaye woluyali nende okhuwulila nende okhuloonda kata omundu wahasi nakholelwe okhuba omwimilisi wenyu. Toto bwene ulia witsa okhumenya mwinywe yakhalole obwawukhani obukhongo. Kho mutilane nende emilukha chianje nende chiabalia*

*banoondakhwo abalunjifu muchitile kakaka nende ameeno ketsinyanga. Ne mwire ehale nende amakhuwa karulila, toto buli lirulila nobuchishi ne buli obuchili ni obukori ne buli obukori ni mumulilo."*

**(Yachikana Samwana Dawud nende Tirmidhy, ne yaboola mbu ni Hadithi indayi yahabwene.)**

## **29. HADITHI YA MAKHUMI KABILI NENDE TISA.**

### **INJILA YOMWIKULU.**

**Okhurula khu Muadh Omusiani wa Jabal – Nyasaye omuchamile yaboola mbu:**

*"Ewe Omurumwa wa Nyasaye mbolelekhwo emilimo chinyinjisia mwikulu mana chinde ehale nende omulilo." Naboola mbu: " oreebele likhuwa likhongo, nalio ni eliangu khu ulia wa Nyasaye okholele okhuba eliangu, : olaame Nyasaye ne olamutsokasiakhwo nende shiosi shiosi tawe, mana olumilile okhulaama (iswala) ne orusie eshihanwa (izakaa) ne ofunge ramadhani, ne ohije khu inzu (hajji), " mana naboola mbu: koo ebechesiekhwo omuliango kwetsimbabaasi? Okhufunga ni ingabo, ne eshihanwa shisuminjia amabii shinga amaatsi kasuminjia omulilo, nende okhulaama khwomundu mushilo hakari mana nasoma mbu : (tsimbafu tsiabu tswumilana okhurulana nende okhukhaya okhwiyalisia - ukhuula shingala yoola –bakholanga.)*

*Mana naboola mbu: "ekhuboolelekhwo omurwe kwamakhuwa, nende isiilo yakwo nende hekulu yakwo?" nemboola mbu : " eeh Omurumwa wa Nyasaye." Naboola mbu: " omurwe kwamakhuwa ni obwisilamu, ne isiilo yakwo ni iswala, (okhulaama) ne hekulu yakwo nende yoluyali yakwo ni jihadi (okhukhalabana) mana naboola mbu: ekhuboolelekhwo amakhongo ka yako koosi? " nemboola mbu : "eeh Omurumwa wa Nyasaye." Natiila olulimi lulwe naboola mbu: " wikalile luno! " nemboola mbu : "ewe omurumwa wa Nyasaye, toto efwe khubukulilungwa khubuli liakhulomaloma?" naboola mbu: "mama wuwo akhusitoyela ewe Muadh: abaandu balisukunwa mumulilo nende obweni bwabu ." -nohomba yaboola- nende amoolu kabu, halali khukalia aketsinimi tsiabu tsiachesa."*

**(Tirmidhy niwachikana naboola mbu Hadithi indayi eyahabwene.)**

## **30. HADITHI YAMAKHUMI KATARU.**

### **KA NYASAYE AKHOYESHELA.**

**Okhurula khusamwana Tsalaba Alkushny Jurthum Omusiani wa Nashir – Nyasaye amuchamile- okhurula khumurumwa wa Nyasaye (saw) Yaboola mbu:**

*"Toto Nyasaye yabalachilisia amalako kho mulakafunache tawe, ne yabarereho tsinzakho mulatsiruume tawe, ne yabakania ebindu bia mulakhola tawe kho mulabikhole tawe, ne yawulelela amukhuwa kandi*

*khulwe tsimbabaasi khwinywe, shiyebilila tawe, kho mulabikhabe tawe.”*  
**(Hadithi Indayi. Dar Qutny nende abaandi nibo bachikana.)**

### **31. HADITHI YAMAKHUMI KATARU NENDE NDALA.**

#### **OBUTAKATIFU.**

**Okhurula khu Samwana Abbas Sahal Omusiani wa Sa'ad Saidy – Nyasaye amufuchilile yaboola mbu:**

*“ Omundu yetsa khumurumwa (saw) naboola mbu: “ ewe Omurumwa wa Nyasaye nzechesiekhwo Omulimo kulia nekukhola Nyasaye alanjama, nende abandu boosi balanjama.” Naboola mbu: “khupila likosi eshialo Nyasaye alakhuchama, ne khupila likosi ebili khubandu abandu balakhuchama.”*

**(Hadithi indayi Omusiani wa Maja nende abandi nibobachikana nende olunyali olulayi.)**

### **32.HADITHI YAMAKHUMI KATARU NENDE TSIBILI.**

#### **OKHUMISIA NENDE OKHUMISANIA KHUBULAO.**

**Okhurula khu Samwana Said Sad Omusiani wa Malik Omusiani wa Sinaan wa Khudr – Nyasaye omuchamile- toto Omurumwa wa Nyasaye (saw) yaboola mbu:**

*“ okhumisia nohomba okhumisania tawe.”*

**(Hadithi indayi, Omusiani wa Maja nende Daruqutny nende abandi nibo bachikana nilunjikhe.)**

### **33.HADITHI YA MAKHUMI KATARU NENDE KHATARU.**

**Okhurula khusamwana Abbas – Nyasaye abachamile – toto Omurumwa wa Nyasaye (saw) yaboola mbu:**

*“Abandu bahelesibungwa akabechikanilangakhwo, khulwa okhuboola khwabu, Omundu yakhabanizile emiandu chiabandi nende amatsayi kabu. Halali kali khu ulia ubanza (naboola mbu neshishie) okhwinoosia, ne owundi oyo okhwitsuba.”*

**(Haditsi indayi Baihaqy nende abandi nibo bachikana ne ebuleka wayo ili mu sahihain.)**

### **34. HADITHI YA MAKHUMI KATARU NENDE KHANE.**

#### **OKHUKANIA AMABIL.**

**Okhurula khusamwana Said owelitokho ya Khudhr. – Nyasaye amuchamile – yaboola mbu: ndawulila Omurumwa nabolanga mbu:**

*“ulua ulola mwinywe libii, alikanie nende omukhono kukwe, ne nalanya tawe alikanie nende olulimi lulwe,ne nalanyala tawe alikanie nende omwoyo kukwe, ne obo nibo obuteshele muno bwobusuubili.”*

**(Muslim niwachikana).**

## 35. HADITHI YA MAKHUMI KATARU NENDE TSIRANO.

EMIIMA.

**Okhurula Khu Abi Huraira- Nyasaye omuchamile – yaboola mbu: Omurumwa wa Nyasaye yaboola mbu:**

*“Mulalolelanila eshikhalkhali tawe, nemulaninanilia ebindu tawe, ne mulasilana tawe, ne mulahesania emikongo tawe, ne alakusilia mulala wenyu khubukusi bwowundi namalile okhukula tawe, ne mube abasumba ba Nyasaye abananda. Omwisilamu nomwana wabu omwisilamu, shamukholela obubii tawe, nohomba shamukhoba tawe, nohomba shamulechelesia tawe, okhuria Nyasaye khuli hano,.. niyechesia khushilifu shishie okhula khataru. Biyela omundu okhuba owamabii nalechelesia omwana wabu omwisilamu. Buli omwisilamu khumwisilamu bakaniwa khubo: “amatsayi keke, omwandu kukwe, nende oluyali lulwe.”*

**(Muslim niye wachikana.)**

## 36. HADITHI YAMAKHUMI KATARU NENDE TSISAASABA.

OKHUKHONYANA KHUBULAYI.

**Okhurula khu Abi Huraira- Nyasaye amuchamile- okhurula khumurumwa (saw) yaboola mbu:**

*“Ulia utiukhula khumusubili omusiko, khumisiko chiokhushialo khuno, Nyasaye alimutiukhula omusiko kwobusiro bweyinyanga yeyindukho. Ne ulia wanguyilia usitoyelwe Nyasaye alamwanguyisilia khushialo nende mwikulu. Ne ulia Ufuunikha Omwisilamu Nyasaye alamufuunikha khushialo nende mwikulu. Ne Nyasaye ali khubukhoonyi bwomundu, omundu oyo nali mukhukhoonya owashie. Ne ulia useena injila nakhaaba ubumanyi Nyasaye omwanguyisilinjia injila yokhutsia mwikulu. Ne abandu shibekhalanga munzu ndala khutsinzu tsia Nyasaye nibasooma eshitabu shia Nyasaye okhuula obwihitselefu bubeshelanga ne tsimbabaasi tsibafimbanga ne abamalaika babafumbeelanga, ne Nyasaye abarumbulanga khubilia ebili ewuwe. Kho ulia webikhole bibie bitong’a inyuma oluya lulwe shilwakhumukhoonya tawe,”*

**(Muslim niye wachikana naboola mbu nende munomela yino)**

## 37. HADITHI YAMAKHUMI KATARU NENDE SABA.

OBUHAANI BWA NYASAYE.

Okhurula khumusiani wa Abbass – Nyasaye abachamile- okhurula khu Murumwa wa Nyasaye khukalia akakananga okhurula khu Nyasaye wuwe oweyifuma, yaboola mbu:

'' toto Nyasaye yahandika amalayi nende amabii , mana nakenoosia ako. Kho ulia ura mumwoyo okhukhola lilayi,mana akhaye okhulikhola Nyasaye amuhandichilanga ewuwe lilayi lilaamba, ne nalira mumwoyo mana yalikhola Nyasaye amuhandichilanga amalayi ekhumi amumetelekhwo okhuula amakhabi imia saba okhuula okhumeta okhunji.

Ne nasubila okhukhola libii mana abule okhulikhola Nyasaye amuhandichilanga lilayi lilamba, ne nalisubilila mana yalikhola Nyasaye amuhandichilanga libii elala."

**(Bukhari nende Muslim nobo bachikana. Mubitabu biabu nende munomela ino)**

### **38. HADITHI YAMAKHUMI KATARU NENDE MUNANE.**

OKHUSINYIKHA KHWA NYASAYE  
NENDE OKHUCHAMA KHUKHWE.

**Okhurula khu Abi Huraira – Nyasaye amuchamile – yaboola mbu:  
"Omurumwa wa Nyasaye yaboola mbu: toto Nyasaye woluyali yaboola mbu:**

*"ulia usinyisilia imulina wanje ndalaba embushile okhumulwana. Ne omusumba wanje shasitanga ahambi ninasi khushindu shia ndayanza muno mumakuwa kandamulomesia, ne omusumba wanje alatsilila okhusitakhwo nakhola amalayi okhuula emuchame. Nenemuchama nditsa okhuba tsimbulililo tsitsie tsiawulililanga nennde tsindolelo tsitsie tsialolelanga nende omukhono kukwe kwakhuyilanga nende eshilenje shishie shiachendelanga. Niyareeba ndalamuhelesia ne niyenya obulindi ndalamulinda."*

**(BUKHARI NIYE WACHIKANA.)**

### **39. HADITHI YAMAKHUMI KATARU NENDE TISA.**

BILIA BIBULAMWO TSIMBI.

**Okhurula khumusiani wa Abbas – Nyasaye amuchamile- yaboola mbu  
omurumwa wa Nyasaye yaboola mbu:**

*"Toto Nyasaye yandeshela khubandu banje: okhwitsukhana, nende okhwibilila nende kalia akaluunyibwe."*

**(Hadithi indayi Omusiani wa Majah nende Baihaqy nende abaandi nibo bachikana)**

## 40. HADITHI YA MAKHUMI KANE.

### OKHUMENYA KHUSHIALO.

**Okhurula khumusiani wa Amru – Nyasaye abachamile – yaboola mbu:**

*“Omurumwa yatila libeka lianje naboola mbu: “ Ba khushialo shinga omucheni, nohomba shinga omuburi njila”*

**Ne Omusiani wa umar – Nyasaye abachamile- yaboolanga mbu:**

*“Niwuula ingolobe olalinda itsuli tawe, ne ni ula itsuli olalinda ingolobe tawe, ne wikhonyele obulayi okhulama (omubili) kukhwo noshili okhuba omulwale. Nende obulamu bubwo noshili okhufwa.”*

**(Bukhari niye wachikana.)**

## 41. HADITHI WAMAKHUMI KANE NENDE NDALA.

### OBWIKOMBI BWOMUSUUBILI.

**Okhurula khu Samwana Mohammad Abdullahi Amru omusiani wa Al-as- Nyasaye abachamile- yaboola mbu:**

*“Omurumwa (saw) yaboola mbu: shinomusuubili mulala wenyu okhuula obwikombi bubwe bulondokhane nende kandetsela.”*

**(Khwarusia Mushitabu shia Al-huja nende olunyaali lwahabwene.)**

## 42. HADITHI YAMAKHUMI KANE NENDE TSIBILI.

### OBULESHELI BWA NYASAYE.

**Okhurula khu Anas- Nyasaye omuchamile- yaboola mbu : ndawulila omurumwa (saw) naboolanga mbu:**

*“Nyasaye aboola mbu: “ewe omundu toto bwene ewe ni usaba mana osuubile , ndalakhuleshela kali khwiwe ne shindalateeba tawe. Ewe omundu tsimbi tsitsio nitsula hekulu khumaleesi mana usabe obulesheli nditsa okhuleshela. Ewe omundu niwunzitsila nende tsimbi tsiyela shinga eshialo mana unyoole nolanzokasinjia nende eshindu tawe, ndakhakhwitsile nende obulesheli buyela burio.”*

**(Tirmidhy niye wachikana naboola mbu hadithi indayi.)**

